

# Ban Ki Moon di «grüezi» e grazia fitg

Visita a chaschun da l'anniversari da commembranza

■ (anr/vi) **Ban Ki Moon pledenta tut ils Svizzers ed engrazia per ils diesch onns commembranza tar l'ONU. Il secretari general da l'organisaziun mundiala ha gudagnà la simpatia da l'assemblea cun in simpel «grüezi».** Ier da mezdi ha l'assemblea federala beneventà il secretari general da l'ONU. *Ban Ki Moon* ha gratulà a la Svizra per l'anniversari da commembranza tar las naziuns unidas. L'emprim ha el salidà il parlament en las quatter linguas naziunalas ed ha gudagnà la simpatia cun dir: «Grüezi, es ist mir eine Ehre hier zu sein.»

Ban n'ha betg mo pledentà ils parlamentaris, mabain tut ils Svizzers: «Vus avais giugà ina rolla impurtanta per defender ils dretgs umans.» La Svizra saja ordvart generusa e na stritgia betg sco auters stadis ils daners per la cooperaziun al svilup.

*Joseph Deiss* haja manà durant in onn l'assemblea da l'ONU cun la precisium d'in'ura svizra. Questa qualitat svizra na saja betg da chapir sco tenuta fraida, ha ditg Ban. Sut questa precisium chattian ins era la passium da cuntanscher insatge.

«Quai hai jau constatà a Berna ed a Genevra.» La Svizra haja fatg or da sia multifariadad ina fermezza. Era l'ONU saja ina organisaziun multifaria cun bleras funcziuns – sco in cuntè da satg svizzer.

A la fin da ses pled ha Ban appellà als Svizzers da gidar a cuntanscher las finamiras per il clima, da gidar a liberar il mund da la smanatscha atomara, da gidar ils pajais arabs da daventar pli democratics e da franar la violenza en la Siria.

Suenter la visita en il parlament ha il secretari general gentà cun ils cussegliers federals *Eveline Widmer-Schlumpf*, *Didier Burkhalter* e *Doris Leuthard*. Ils politichers han discurrì davart ina candidatura svizra per in sez en il cussegl da segirezza da l'ONU.

Il glindesdi passà avant diesch onns è la Svizra daventada sco 190avel stadi commembra da l'ONU. Sco emprim pajais ha la Svizra decidì sia commembranza en ina votaziun dal pievel. Las festivitads uffizialas per l'anniversari han gì lieu gia il glindesdi a New York, nua ch'i ha dà in grond retschaviment cun *Joseph Deiss* che ha presidià la l'assemblea generala da l'ONU il 2010/2011.